

CHICKEN DINNER

Mama, don' do it, please,
Don' cook dat chicken fe dinner,
We know dat chicken from she hatch,
She is de only one in de batch
Dat de mongoose didn' catch,
Please don' cook her fe dinner.

Mama, don' do it, please,
Don' cook dat chicken fe dinner,
Yuh mean to tell mi yuh feget
Yuh promise her to we as a pet
She not even have a chance to lay yet
An yuh want to cook her fe dinner.

Mama, don' do it, please,
Don' cook dat chicken fe dinner,
Don' give Henrietta de chop,
Ah tell yuh what, we could swop,
We will get yuh one from de shop,
If yuh promise not to cook her fe dinner.

Mama, me really glad, yuh know,
Yuh never cook Henny fe dinner,
An she glad too, ah' bet,
Oh Lawd, me suddenly feel upset,
Yuh don' suppose is somebody else pet
We eating now fe dinner?

